



Inatsisartunut ilaasortaq  
Jens-Frederik Nielsen  
Demokraatit

08-08-2023  
Sags nr. 2023 - 20265  
Akt. id. 23257870

Postboks 260  
3900 Nuuk  
Tlf. (+299) 34 50 00  
Fax (+299) 34 63 64  
E-mail: isn@nanoq.gl  
www.naalakkersuisut.gl

## § 37 naapertorlugu apeqqummut nr. 105-imut atugarliortunut siunnersuisoqatigiit pillugu akissuteqaat

Asasara Jens-Frederik Nielsen.

Qujanaq apeqqutinut. Apeqqutit ataasiakkaarlugit ataani allanneqarput, kingornalu akissutaat.

### 1. "Immikkut pisariaqartitsisunut Siunnersuisooqatigiit" soorlu maannakkut "Aningaasaqarnermut Siunnersuisooqatigiit" assigalugu pilersinneqarnissaanut Naalakkersuisut qanoq isumaqarpat? a. Aningaasaqarnermut Siunnersuisooqatigiit ingerlanneqarneranut ukiumut qanoq aningaasartuuteqarfigineqarpat?

Atugarliortut pillugit suliassaqaqfimmil siunnersuisoqatigiinnik assingusumik pilersitsinissaq periarfissaanngitsoq Naalakkersuisut naliliiffigaat. Tamanna pissuteqarpoq, ataatsimut isigalugu suliassaqaqfik pillugu paasissutissanik tigussaasunik annikitsuinnarmik peqartoqarmat. Taamaattumik atugarliortunut siunnersuisoqatigiit Aningaasaqarnermut Siunnersuisoqatigiittulli inassuteqaateqarsinnaaneri ajornakusuussaaq. Aningaasaqarnermut Siunnersuisoqatigiit Kalaallit Nunaata aningaasaqarneranut, immikkoortunut, il.il. pillugit paasissutissat qulakkiikkat tunngavigalugit inassuteqartarput, aamma atugarliortunut suliassaqaqfimmil paasissutissanik assingusunik pissarsinissaq periarfissaanngilaq.

Aningaasaqarnermut Naligiissitaanermullu Naalakkersuisoqarfik ilisimatitsivoq, 2023-mut Aningaasaqarnermut Inatsimmi kontumi pingaarnermi 20.01.01-imi Aningaasaqarnermut Siunnersuisoqatigiinnut ukiumut 1 mio. kr-it immikkoortinneqartut.<sup>1</sup>

<sup>1</sup> Aningaasaqarnermut Siunnersuisoqatigiit pillugit siunertaq atuuffillu pillugit 2023-mut Aningaasanut Inatsimmi ilanngullugu allaqqavoq imatut: "Aningaasaqarnermut Siunnersuisoqatigiit akit nikerarnerisa ineriartornerat aningaasaqarnerullu attanneqarsinnaanera kimulluunniit attuumassuteqanngitsumik naliliiffiginissaat siunertaralugit sulipput. Kiisalu aningaasaqarnermut immiut nammassinnaanerup anguneqarnissaanut piffissamut ungasissumut pilersaarut naapertorlugu siuariarnerit aalajangersimasut naammannersut suliamik ilisimasalittut siunnersuisoqatigiit naliliiffigisassavaat. Siunnersuisoqatigiit Aningaasaqarnermut Naalakkersuisoqarfimmit allatseqarfeqartinneqarput, taamaattorli aamma sunik suliaqassanerlutik aammalu sulinertik nammineq aalajangertussaallugu. Aningaasaqarnermut Siunnersuisoqatigiit Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. 26, 28. november 2016-imeersoq naapertorlugu ivertinneqarput."



Suliassaqarfimmut kontumi 160101 "Aningaasaqarnermut Siunnersuisoqatigiit" piffissami 2019-2022-mi agguaqatigiissillugu aningaasartuutit 524 t.kr-iupput aamma 2023-mi junip qaammataa ilanngullugu 449 t.kr-iullutik.

Naalakkersuisut piginnaasat aaqqissugaanerat ataatsimut isigalugu suliaqarput. Naalakkersuisut ilaatigut Naalakkersuisut angerlarsimaffeqanngitsut pillugit periusissiaannik saqqummiupput, arlalinnik suliniutinik imaqartoq, arlalillu aallartinneqarlutik aamma/imaluunniit naammassineqarlutik. Atugarliortunut angerlarsimaffeqanngitsunullu suliassaqarfimmi ilisimasat amigaataanerat pissutigalugu, Naalakkersuisut 2022-mi nuna tamkkerlugu angerlarsimaffeqanngitsut pillugit kisitsinermik saqqummiussipput. Kommunini tamani angerlarsimaffeqanngitsut qanoq amerlatiginerannut kisitsineq killiffillinermi siulliuvoq. Tamatuma saniatigut Naalakkersuisut angerlarsimaffeqanngitsunut suliassaqarfik pillugu 2022-mi misissueqqissaarnermik saqqummiussipput, angerlarsimaffeqannginneq pillugu ajornartorsiutinik arlalinnik tikkuaasoq, aamma angerlarsimaffeqanngitsut ajornartorsiutaannik katitigaasunik, soorlu ersinngitsumik angerlarsimaffeqannginneq, itiliisoq.

Naalakkersuisut pingaartippaat, inuiaqatigiinni atugarliortuuneq pillugu ajornartorsiutit ersarissarneqassasut oqallisigineqarlutillu, aamma suliassaqarfik ataatsimut isigalugu pitsanngorsaavigisariaqartoq. Taamaattumik Naalakkersuisut 2021-mi nuna tamakkerlugu angerlarsimaffeqanngitsut pillugit oqaloqatigiittarfik pilersippaat. Oqaloqatigiittarfik ilisimasanut tunngatillugu Naalakkersuisunut ikiuutaavoq, aamma periusissiami ataatsimut isigalugu suliamut paasisimasalinnit ilisimasat tunngavigineqarlutik. Isumaginninnermut, Suliffeqarnermut Nunamullu Namminermut Naalakkersuisoqarfimmi sulisussaaleqineq pissutigalugu oqaloqatigiittarfik 2023-mi uninngatinneqarallapoq, kisianni angerlarsimaffeqanngitsunut periusissiamut ilaatillugu pilersaarutaavoq, oqaloqatigiittarfik 2023-mi ukiakkut aallarteqqinneqassasoq.

Angerlarsimaffeqanngitsut pillugit oqaloqatigiittarfimmut tunngatillugu paasiuminartuunissaa Naalakkersuisut nukittorsarniarpaat, taamaattumik siunissami oqaloqatigiittarfiup tigussaasumik inassuteqartarnissaa pillugu suliniartoqassasoq isumaliuutigineqarsinnaalluni.

## **2. "Immikkut pisariaqartitsisunut Siunnersuisooqatigiit" pilersinneqarnissaanut ingerlanneqarnissaanullu pisortanut aningaasatigut allaffissornikkullu qanoq kinguneqassava?"**

Siunnersuisoqatigiit katitigaanerat ataatsimiittarnerillu qanoq akulikitsigisarnissaat il.il. pillugu erseqqissaasoqanngimmat, tamanna akineqarsinnaanngilaq. Aningaasaqarnermut Siunnersuisoqatigiinnut aningaasartuutit pillugit apeqqummut nr. 1-imut akissut innersuussutigineqarpoq.

## **3. Naalakkersuisut pineqartumut attuumassutilinnik allanik ilisimatitsissuteqarsinnaanerlutik?**

Apeqqummut nr. 1-imut akissut takuuk.

Inussiarnersumik inuulluaqquillunga

Jess Svane